

D.R. 11/90

Naskhah Sahib—Bahasa Malaysia

## RANG UNDANG-UNDANG ZON BEBAS 1990

### SUSUNAN FASAL

#### BAHAGIAN I

##### PERMULAAN

Fasal

1. Tajuk ringkas dan muta berkuatkuasa.
2. Tafsiran.
3. Perisytiharan zon-zon bebas dan perlantikan Pihak Berkuasa.

#### BAHAGIAN II

##### AKTTVITI YANG DIBENARKAN DALAM ZON BEBAS

4. Barang-barang dan perkhidmatan dalam zon bebas.
5. Urusan mengenai atau pelupusan barang-barang dalam zon bebas.
6. Pengecualian barang-barang dan perkhidmatan-perkhidmatan daripada taraf bebas.
7. Barang-barang disifatkan dieksport dari atau diimport ke dalam Malaysia.
8. Barang-barang yang dikilang dalam zon perindustrian bebas.
9. Penalti.
10. Aktiviti.
11. Barang-barang yang dibenarkan ke dalam zon perindustrian bebas.
12. Barang-barang yang dibenarkan ke dalam zon perdagangan bebas.

#### BAHAGIAN III

##### FUNGSI-FUNGSI TERTENTU PIHAK BERKUASA

13. Pihak Berkuasa hendaklah mengadakan kemudahan-kemudahan.

## Fasal

14. Pihak Berkuasa boleh membenarkan pembinaan bangunan-bangunan persendirian, dsb.
15. Kemasukan dan pemastautinan dalam suatu zon perindustrian bebas.
16. Penyingkiran barang-barang tertentu, dsb.
17. Laporan-laporan Tahunan dan akaun-akaun.

## BAHAGIAN IV

KESALAHAN-KESALAHAN, PENALTI-PENALTI,  
PENGGELEDAHAN, PENYITAAN, TANGKAPAN DAN  
PERUNTUKAN-PERUNTUKAN MENGENAI PERBICARAAN  
DAN PROSIDING

18. Orang-orang yang terikat untuk memberi maklumat.
19. Penalti bagi kesalahan yang selainnya tidak diperuntukkan dengan nyata.
20. Percubaan dan persubahatan.
21. Mengeluarkan waran geledah.
22. Bila penggeledahan boleh dibuat tanpa waran.
23. Pegawai-pegawai kastam boleh menahan dan menggeledah kenderaan.
24. Kuasa untuk membuka bungkusan dan memeriksa barang-barang.
25. Pemeriksaan orang-orang yang memasuki dan keluar dari zon bebas.
26. Penyitaan barang-barang yang menjadi subjek sesuatu kesalahan.
27. Pemulangan atau pelupusan harta alih.
28. Kuasa tangkapan.
29. Peruntukan-peruntukan berkaitan dengan penangkapan tanpa waran.
30. Siapa yang boleh mendakwa.
31. Perlindungan bagi pemberi maklumat daripada diketahui.
32. Kesalahan oleh kumpulan orang, dan oleh pengkhidmat-pengkhidmat dan ejen-ejen.
33. Mengkompaun kesalahan.
34. Perlindungan bagi Kerajaan daripada liabiliti.
35. Perlindungan bagi pegawai kastam daripada liabiliti.

Fasal

36. Tiada kos atau ganti rugi boleh didapati melainkan penyitaan dibuat tanpa sebab yang munasabah atau sebab yang mungkin.
37. Sabitan di bawah undang-undang bertulis yang tain.
38. Barang-barang yang boleh dilucuthak.
39. Mahkamah hendaklah memerintah perlucuthakan dan pelupusan barang-barang yang disita.
40. Barang-barang yang disita yang berkenaan dengannya tiada apa-apa pendakwaan.
41. Barang-barang yang disita boleh diserahkan kepada pemunya atau orang lain.

## BAHAGIAN V

### PERUNTUKAN-PERUNTUKAN PELBAGAI

42. Vesel berkaitan dengan zon bebas.
43. Pegawai kastam yang hak boleh mengambil sampel.
44. Pengkhidmat awam.
45. Upah.
46. Rayuan atas keputusan Pihak Berkuasa atau Ketua Pengarah.
47. Kuasa membuat peraturan-peraturan.
48. Kuasa untuk mewakili.

## BAHAGIAN VI

### PINDAAN-PINDAAN DAN PEMANSUHAN

49. Pindaan-pindaan dan pemansuhan.
50. Zon perdagangan bebas disifatkan sebagai zon perindustrian bebas.
51. Menteri boleh membatalkan mana-mana pengisytiharan atau perintah.

JADUAL PERTAMA

JADUAL KEDUA

JADUAL KETIGA—Pindaan dan Pemansuhan.



## RANG UNDANG-UNDANG

*bernama*

Suatu Akta untuk membuat peruntukan mengenai penubuhan zon-zon bebas dalam Malaysia untuk menggalakkan kehidupan ekonomi negara dan bagi maksud-maksud yang berkaitan dengannya.

[ ]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

## BAHAGIAN I

## PERMULAAN

1. (1) Akta ini bolehlah dinamakan Akta Zon Bebas 1990. Tajuk ringkas dan mula berkuatkuasa.
  - (2) Akta ini hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta* dan Menteri bolehlah menetapkan tarikh mula berkuatkuasa yang berlainan bagi peruntukan-peruntukan yang berlainan dalam Akta ini.
2. (1) Dalam Akta ini, melainkan jika konteksnya menghendaki makna yang lain— Tafsiran.

"aktiviti" termasuklah aktiviti perdagangan dan aktiviti pengilangan dan pengendalian-pengendalian yang berkaitan;

"aktiviti perdagangan" termasuklah berniaga, memecah pukal, menggred, pembungkusan semula, melabel semula dan transit;

"barang-barang" termasuklah binatang, burung, ikan, tumbuhan dan semua jenis harta alih;

*Akta 64.* "cukai jualan" ertinya apa-apa cukai yang dikenakan oleh atau di bawah Akta Cukai Jualan 1972;

*Akta 151.* "cukai perkhidmatan" ertinya apa-apa cukai yang dikenakan oleh atau di bawah Akta Cukai Perkhidmatan 1975;

*Akta 176.* "duti eksais" ertinya apa-apa duti yang dikenakan oleh atau di bawah Akta Eksais 1976;

*Akta 235.* "duti kastam" ertinya apa-apa duti yang dikenakan oleh atau di bawah Akta Kastam 1967;

"kawasan utama kastam" ertinya mana-mana bahagian Malaysia tetapi tidak termasuk zon bebas, Labuan dan Langkawi;

"Labuan" hendaklah mempunyai pengertian yang sama seperti yang diberikan kepadanya di bawah seksyen 154 Akta Kastam 1967;

"Langkawi" hendaklah mempunyai pengertian yang sama seperti yang diberikan kepadanya di bawah seksyen 163A Akta Kastam 1967;

"Menteri" ertinya Menteri yang sedang dipertanggungkan dengan tanggungjawab bagi kewangan;

"nilai" berkaitan dengan barang-barang yang diimport, ertinya harga yang akan diberi oleh seorang pengimport bagi barang-barang itu atas pembelian di pasaran terbuka jika barang-barang itu diserahkan kepadanya di tempat bayaran duti kastam dan jika tambang muatan, insurans, komisen dan semua kos, caj dan perbelanjaan lain (kecuali apa-apa duti kastam dan pengelolaan dermaga, simpanan, pemindahan kelengkapan-kelengkapan jentera dan caj-caj lain yang dilakukan dalam suatu zon bebas) yang bersampingan dengan pembelian dan penyerahan di tempat itu telah dibayar;

"pengendalian" ertinya pengendalian-pengendalian yang dinyatakan di bawah aktiviti yang diluluskan oleh Menteri di bawah peruntukan seksyen 10;

"pengilangan" ertinya penukaran dengan cara tangan atau jentera bahan organik atau tak organik kepada suatu keluaran bam dengan menukar saiz, bentuk, komposisi, jenis atau kualiti bahan-bahan itu dan termasuklah memasang bahagian-bahagian menjadi suatu jentera atau keluaran lain, tetapi tidak termasuk pemasangan jentera atau kelengkapan bagi maksud pembinaan; dan istilah "aktiviti mengilang" dengan variasi gramatisnya dan dengan ungkapan seasalnya hendaklah ditafsirkan dengan sewajarnya dan, berkaitan dengan istilah itu, ia hendaklah termasuk apa-apa aktiviti yang ditetapkan oleh Ketua Pengarah sebagai aktiviti mengilang:

Dengan syarat bahawa Ketua Pengarah boleh mengikut budi bicara mutlaknya menentukan bahawa hasil bagi apa-apa pengilangan atau aktiviti itu bukanlah suatu keluaran barang yang baru;

"perkhidmatan" mempunyai pengertian yang sama seperti yang diberikan kepada istilah "perkhidmatan ditetapkan" di bawah Peraturan-Peraturan Perkhidmatan 1975;

*P.U. (A)  
52175.*

"Pihak Berkuasa" ertinya mana-mana badan berkanun atau syarikat atau jabatan bagi Kerajaan Malaysia atau bagi mana-mana Negeri dalam Malaysia yang dilantik di bawah peruntukan subseksyen (2) seksyen 3 untuk mentadbir, menyenggara dan mengendali mana-mana zon bebas;

"zon bebas" ertinya mana-mana bahagian Malaysia yang diisytiharkan di bawah peruntukan subseksyen (1) seksyen 3 menjadi suatu zon perdagangan bebas atau zon perindustrian bebas.

(2) Bagi maksud tafsiran perkataan "nilai", import ertinya import dari suatu zon bebas ke dalam suatu kawasan utama kastam.

(3) Ungkapan "Ketua Pengarah", "pegawai kastam", "pegawai kanan kastam", "pegawai kastam yang hak" dan "barang-barang berduti" masing-masing hendaklah mempunyai pengertian yang diberikan kepadanya dalam Akta Kastam 1967.

Perisy-  
tihan  
zon-zon  
bebas  
dan perlan-  
tikan Pihak  
Berkuasa.

3. (1) Menteri boleh melalui pemberitahuan dalam *Warta*, mengisytiharkan mana-mana kawasan dalam Malaysia sebagai suatu zon perdagangan bebas atau zon perindustrian bebas dan setiap pemberitahuan itu hendaklah mentakrifkan had-had zon itu.

(2) Menteri boleh melantik mana-mana badan berkanun yang ditubuhkan atau diwujudkan oleh atau di bawah suatu undang-undang Persekutuan atau mana-mana jabatan bagi Kerajaan Malaysia atau dengan persetujuan Negeri yang berkenaan, mana-mana badan berkanun yang ditubuhkan atau dibentuk oleh atau di bawah suatu undang-undang Negeri atau mana-mana jabatan Kerajaan bagi suatu Negeri atau mana-mana syarikat sebagai Pihak Berkuasa untuk mentadbir, menyelenggara dan mengendali mana-mana zon bebas yang telah diisytiharkan sedemikian di bawah subseksyen (1).

## BAHAGIAN II

### AKTIVITI YANG DIBENARKAN DALAM ZON BEBAS

Barang"  
barang  
dan perkhid-  
matan dalam  
zon bebas.

4. Tertakluk kepada Akta ini apa-apa jenis barang-barang dan perkhidmatan kecuali bagi yang dilarang dengan tertentu dan mutlak oleh undang-undang, boleh dibawa masuk, dikeluarkan, dihasilkan atau dibekalkan dalam suatu zon bebas tanpa bayaran apa-apa duti kastam, duti eksais, cukai jualan atau cukai perkhidmatan.

Urusan  
mengenai  
atau  
pelupusan  
barang-  
barang  
dalam  
zon bebas.

5. (1) Melainkan jika diperuntukkan selainnya di bawah Akta ini atau mana-mana peraturan di bawahnya tiada seorang pun boleh berurusan dengan atau selainnya melupuskan apa-apa barang dalam zon bebas.

(2) Tertakluk kepada peruntukan-peruntukan Akta ini, barang-barang dalam suatu zon bebas bolehlah—

(a) dipindahkan dari zon bebas itu untuk eksport atau dihantar ke dalam suatu zon bebas yang lain sama ada dalam bungkusan asal atau selainnya;

(b) melainkan jika diarahkan selainnya oleh Pihak Berkuasa—

(i) disimpan, dijual, dipamer, dipecah-pecahkan, dibungkus semula, dipasang, diedarkan, disisihkan, digredkan, dibersihkan, dicampur, atau selainnya dikendelat atau dikilang mengikut peruntukan-peruntukan Akta ini, atau

(ii) dimansuhkan;

(c) dengan kelulusan Pihak Berkuasa, dan tertakluk kepada syarat-syarat yang boleh dikenakan olehnya dihantar ke dalam mana-mana bahagian kawasan utama kastam dalam bungkusan asal dengan syarat bahawa Pihak Berkuasa hendaklah berunding dengan Ketua Pengarah sebelum pemindahan barang-barang itu dibenarkan.

(3) Peruntukan-peruntukan seksyen ini tidaklah terpakai kepada barang-barang yang dikecualikan oleh perintah yang dibuat di bawah subseksyen (1) seksyen 6.

6. (1) Menteri bolehlah, melalui perintah yang disiarkan dalam *Warta*, mengecualikan apa-apa barang atau perkhidmatan daripada peruntukan seksyen 4.

(2) Walau apa pun apa-apa jua yang berlawanan dengan mana-mana undang-undang bertulis, peruntukan-peruntukan Akta Kastam 1967, Akta Eksais 1976, Akta Cukai Jualan 1972 dan Akta Cukai Perkhidmatan 1975 hendaklah terpakai kepada barang-barang dan perkhidmatan yang dikecualikan sedemikian seolah-olah zon bebas itu adalah suatu tempat dalam kawasan utama kastam.

Pengecualian barang-barang dan perkhidmatan-perkhidmatan daripada taraf bebas.  
Akta 235.  
Akta 176.  
Akta 64.  
Akta 151.

Barang-barang disifatkan dieksport dari atau diimport ke dalam Malaysia.

7. Melainkan jika diperuntukkan selainnya di bawah Akta ini atau mana-mana peraturan di bawahnya atau di bawah mana-mana undang-undang bertulis yang lain—

- (a) barang-barang yang dibawa keluar dari mana-mana bahagian kawasan utama kastam dan dibawa ke dalam suatu zon bebas hendaklah disifatkan sebagai dieksport dari Malaysia; dan
- (b) barang-barang yang dibawa keluar dari suatu zon bebas dan dibawa ke dalam mana-mana bahagian kawasan utama kastam hendaklah disifatkan sebagai diimport ke dalam Malaysia.

Barang-barang yang dikilang dalam zon perindustrian bebas.

8. (1) Barang-barang yang dikilang dalam suatu zon perindustrian bebas tidak boleh dibawa keluar dari zon itu kecuali—

- (a) untuk eksport; atau
- (b) dengan kelulusan Pihak Berkuasa dan selepas berunding dengan Ketua Pengarah dan, tertakluk kepada syarat-syarat yang boleh dikenakan, bagi pemindahan barang-barang itu ke suatu zon perdagangan bebas.

(2) Tiada perniagaan runcit boleh dijalankan dalam suatu zon perindustrian bebas melainkan dibenarkan oleh Pihak Berkuasa; dan Pihak Berkuasa bolehlah berkaitan dengan kebenaran itu mengenakan syarat seperti yang difikirkannya patut.

(3) Pihak Berkuasa hendaklah berunding dengan Ketua Pengarah sebelum membenarkan apa-apa perniagaan runcit dijalankan dalam suatu zon perindustrian bebas.

(4) Barang-barang yang dikilang dalam suatu zon perindustrian bebas tidak boleh, tanpa kebenaran bertulis seorang pegawai kastam yang hak yang berpangkat tidak rendah daripada Penolong Pengarah Kastam dan Eksais, dipakai atau digunakan dalam zon tersebut.

9. Mana-mana orang yang melanggar peruntukan-peruntukan seksyen 5 atau 8 adalah melakukan suatu kesalahan dan apabila disabitkan boleh, bagi kesalahan kali pertama, dikenakan denda tidak kurang daripada sepuluh kali ganda amaun duti atau cukai kastam atau eksais atau lima ribu ringgit, mengikut mana-mana amaun yang lebih kecil, dan tidak lebih daripada dua puluh kali ganda amaun duti atau cukai kastam atau eksais atau lima ribu ringgit mengikut mana-mana amaun yang lebih besar, dan bagi kesalahan kali kedua atau kesalahan berikutnya denda tidak kurang daripada dua puluh kali ganda duti atau cukai kastam atau eksais atau sepuluh ribu ringgit, mengikut mana-mana amaun yang lebih kecil, dan tidak lebih daripada empat puluh kali ganda duti atau cukai kastam atau eksais atau sepuluh ribu ringgit mengikut mana-mana amaun yang lebih besar, atau penjara bagi suatu tempoh tidak melebihi dua tahun atau kedua-dua denda dan penjara: Penalti.

Dengan syarat bahawa jika nilai barang-barang itu tidak dapat ditentukan penaltinya bolehlah bersamaan dengan suatu jumlah denda tidak melebihi lima ribu ringgit.

10. (1) Dengan kelulusan Menteri— Aktiviti.
- (a) aktiviti-aktiviti yang dinyatakan dalam Jadual Pertama boleh dijalankan dalam suatu zon perdagangan bebas;
  - (b) aktiviti-aktiviti mengilang yang dinyatakan dalam Jadual Kedua boleh dijalankan dalam suatu zon perindustrian bebas.
- (2) Menteri bolehlah dari semasa ke semasa melalui pemberitahuan dalam *Warta* menambah kepada, mengubah atau meminda Jadual Pertama dan Kedua.
- (3) Tertakluk kepada seksyen 8, tiada aktiviti perdagangan boleh dibenarkan dalam suatu zon perindustrian bebas.

Barang-barang yang dibenarkan ke dalam zon perindustrian bebas.

**11.** (1) Tertakluk kepada Akta ini, barang-barang daripada apa-apa jenis yang akan digunakan secara langsung untuk pengilangan barang-barang lain dan adalah diluluskan oleh Menteri atau barang-barang yang dikilangkan di mana-mana bahagian kawasan utama kastam yang adalah untuk eksport bolehlah dibawa ke dalam suatu zon perindustrian bebas.

(2) Tiada barang-barang lain kecuali yang disebut dalam subseksyen (1) boleh dibenarkan dibawa ke dalam suatu zon perindustrian bebas.

Barang-barang yang dibenarkan ke dalam zon perdagangan bebas.

**12.** (1) Tertakluk kepada subseksyen (2), apa-apa jenis barang-barang boleh dibawa ke dalam suatu zon perdagangan bebas untuk perniagaan runcit atau selainnya.

(2) Menteri bolehlah, melalui perintah, melarang apa-apa barang-barang atau kelas barang-barang daripada dibawa ke dalam suatu zon perdagangan bebas.

### BAHAGIAN III

#### FUNGSI-FUNGSI TERTENTU PIHAK BERKUASA

Pihak Berkuasa hendaklah mengadakan kemudahan-kemudahan.

**13.** (1) Menteri boleh menghendaki Pihak Berkuasa mengadakan dan menyenggarakan dalam suatu zon bebas kemudahan-kemudahan yang difikirkannya perlu untuk membolehkan zon itu berfungsi dengan sepatutnya dan dengan cekap.

(2) Menteri boleh memberi kepada Pihak Berkuasa arahan-arahan yang difikirkannya perlu untuk membolehkan suatu zon bebas berfungsi dengan sepatutnya atau bagi maksud melindungi hasil; dan Pihak Berkuasa hendaklah mematuhi mana-mana arahan itu.

(3) Pihak Berkuasa hendaklah mengadakan kemudahan-kemudahan yang mencukupi bagi pegawai-pegawai kastam yang mengikut tugas-tugas mereka dikehendaki hadir dalam atau di perimeter

suatu zon bebas; dan Pihak Berkuasa hendaklah membenarkan pejabat-pejabat kastam ditubuhkan dalam suatu zon bebas—

- (a) untuk membolehkan Ketua Pengarah membuat apa-apa persediaan sebagaimana yang difikirkannya perlu untuk menjamin pengawasan yang sepatutnya, mengenai barang-barang yang dibawa keluar dari zon bebas itu; dan
- (b) bagi maksud yang difikirkan perlu oleh Menteri bagi pentadbiran peruntukan Akta ini dengan cara yang lebih baik.

(4) Pihak Berkuasa hendaklah mengadakan kepungan-kepungan yang mencukupi untuk mengasingkan suatu zon bebas dari kawasan utama kastam bagi perlindungan hasil dan juga peruntukan-peruntukan yang sesuai bagi pergerakan orang-orang, kenderaan, vesel dan barang-barang yang masuk atau keluar dari suatu zon bebas.

**14.** (1) Pihak Berkuasa boleh membenarkan mana-mana orang mendirikan apa-apa bangunan dan lain-lain binaan dalam suatu zon perindustrian bebas mengikut sebagaimana yang dikehendaki,

Pihak Berkuasa boleh membenarkan pembinaan bangunan-bangunan persendirian, dsb.

(2) Pihak Berkuasa boleh, selepas berunding dengan Ketua Pengarah, memajukan kepada atau membenarkan mana-mana orang mengambil, memegang atau menikmati tiap-tiap jenis harta alih dan harta tak alih dalam suatu zon perindustrian bebas atas apa-apa terma dan syarat dan bagi apa-apa tempoh yang ditentukan oleh Pihak Berkuasa.

**15.** (1) Tertakluk kepada Akta ini tiada seorang pun boleh memasuki atau bermastautin dalam suatu zon perindustrian bebas tanpa kebenaran Pihak Berkuasa.

Kemasukan dan pemas-tautinan dalam suatu zon per-industrian bebas.

(2) Mana-mana orang yang melanggar peruntukan subseksyen (1) seksyen ini adalah melakukan suatu kesalahan di bawah Akta ini.

Penyingkir  
barang-  
barang  
tertentu,  
dsb.

**16.** (1) Pihak Berkuasa boleh mengikut budi bicaranya memerintahkan penyingkiran atau pemindahan dari suatu zon perindustrian bebas apa-apa barang-barang atau memberhentikan apa-apa aktiviti atau pengendalian yang pada pendapatnya adalah merbahaya atau mudarat kepada kepentingan, kesihatan atau keselamatan awam.

(2) Suatu perintah oleh Pihak Berkuasa mengenai pemindahan atau penyingkiran apa-apa barang, yang pada pendapat Pihak Berkuasa adalah merbahaya atau mudarat kepada keselamatan awam hendaklah, walaupun suatu rayuan dibuat kepada Menteri, dipatuhi dengan serta-merta tetapi suatu perintah mengenai pemberhentian aktiviti-aktiviti atau pengendalian-pengendalian tidak boleh berkuatkuasa jika suatu rayuan telah dibuat kepada Menteri sehingga keputusan rayuan itu memihak kepada Pihak Berkuasa.

(3) Keputusan Menteri hendaklah muktamad dan tidak boleh tertakluk kepada kajian semula oleh mana-mana mahkamah.

Laporan-  
laporan  
Tahunan  
dan akaun  
akaun.

**17.** (1) Pihak Berkuasa hendaklah menetapkan bentuk dan cara menyimpan akaun-akaun suatu zon perindustrian bebas itu.

(2) Pihak Berkuasa jika diarahkan sedemikian oleh Menteri hendaklah mengemuka kepadanya tiap-tiap tahun dan pada bila-bila masa lain sebagaimana yang ditetapkan oleh Menteri, laporan-laporan mengandungi pernyataan penuh mengenai semua aktiviti, pengendalian, penerimaan dan perbelanjaan dan apa-apa maklumat lain berkenaan dengan zon itu sebagaimana yang dikehendaki oleh Menteri.

## BAHAGIAN IV

KESALAHAN-KESALAHAN, PENALTI-PENALTI,  
PENGGELEDAHAN, PENYITAAAN, TANGKAPAN DAN  
PERUNTUKAN-PERUNTUKAN MENGENAI  
PERBICARAAN DAN PROSIDING

18. Tiap-tiap orang yang dikehendaki oleh pegawai kastam untuk memberi maklumat atau mengemukakan dokumen-dokumen mengenai apa-apa perkara yang menjadi kewajipan pegawai itu untuk menyiasat dan adalah dalam kuasa orang itu untuk memberi atau mengemukakannya adalah terikat untuk memberi maklumat itu atau mengemukakan dokumen-dokumen itu. Orang-orang yang terikat untuk memberi maklumat.
19. Tiap-tiap peninggalan atau pengabaian untuk mematuhi, dan tiap-tiap perbuatan yang dilakukan atau cuba hendak dilakukan bertentangan dengan peruntukan-peruntukan Akta ini atau mana-mana peraturan yang dibuat di bawahnya adalah menjadi suatu kesalahan dan mengenai apa-apa kesalahan itu yang penalti baginya tidak ada diperuntukkan dengan nyata, pesalah itu apabila disabitkan, boleh dikenakan denda tidak melebihi lima ribu ringgit. Penalti bagi kesalahan yang selainnya tidak diperuntukkan dengan nyata.
20. Mana-mana orang yang cuba melakukan apa-apa kesalahan yang boleh dihukum di bawah Akta ini atau di bawah mana-mana peraturan yang dibuat di bawahnya atau bersubahat melakukan kesalahan itu boleh dihukum dengan hukuman yang diperuntukkan bagi kesalahan itu. Percubaan dan per-subahatan.
21. Apabila didapati oleh mana-mana Majistret atas maklumat dan selepas apa-apa siasatan yang difikirkan perlu, bahawa ada sebab yang munasabah bagi mempercayai bahawa dalam mana-mana kedai, gudang atau bangunan atau tempat lain dalam suatu zon bebas, ada tersembunyi atau didepositkan apa-apa barang yang mengenainya suatu kesalahan di bawah Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Akta ini atau mana-mana peraturan yang dibuat di bawahnya Mengeluarkan waran geledah.  
  
Akta 235.  
Akta 176.  
Akta 64.  
Akta 151.

telah dilakukan, Majistret tersebut boleh mengeluarkan suatu waran memberikuasa kepada mana-mana pegawai kastam, yang dinamakan dalam-nya, di waktu siang atau malam dan dengan atau tanpa bantuan—

- (a) untuk memasuki kedai, gudang atau bangunan atau tempat lain itu dan menggeledah dan menyita apa-apa barang yang mengenainya ada sebab bagi mempercayai bahawa kesalahan yang tersebut di atas itu telah dilakukan, dan apa-apa buku atau dokumen yang dengan munasabahnya dipercayai ada kena mengena dengan kes itu;
- (b) untuk menangkap mana-mana orang atau orang-orang yang berada dalam kedai, gudang, bangunan atau tempat itu, yang dalam milikannya barang-barang seperti yang disebut terdahulu itu dijumpai; atau yang disyaki dengan munasabahnya oleh pegawai itu sebagai telah menyembunyi atau mendepositkan barang-barang itu;
- (c) memecah buka, jika perlu, mana-mana pintu kedai, gudang, bangunan atau tempat itu dan masuk ke dalamnya;
- (d) memasuki dengan kekerasan, jika perlu, tempat itu dan tiap-tiap bahagiannya;
- (e) membuang dengan kekerasan apa-apa galangan terhadap kemasukan, penggeledahan, penyitaan dan pemindahan yang dia diberi kuasa untuk melakukannya; dan
- (f) menahan mana-mana orang yang dijumpai berada dalam tempat itu sehingga tempat itu telah digeledah.

Bila penggeledahan boleh dibuat tanpa waran.

22. Apabila didapati oleh mana-mana pegawai kanan kastam bahawa ada sebab yang munasabah bagi mempercayai bahawa dalam mana-mana kedai, gudang atau bangunan atau tempat lain dalam suatu zon bebas, ada tersembunyi atau didepositkan apa-apa barang-barang yang mengenainya suatu kesalahan di bawah Akta

Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Akta ini atau mana-mana peraturan yang dibuat di bawahnya telah dilakukan, dan jika dia mempunyai sebab yang munasabah untuk mempercayai bahawa oleh sebab kelewatan dalam mendapatkan suatu waran geledah di bawah seksyen 21, barang-barang itu atau apa-apa buku atau dokumen-dokumen, yang dengan munasabahnya dipercayai ada kena mengena dengan kes itu mungkin akan dipindahkan, pegawai itu boleh menggunakan dalam, atas dan berkenaan dengan kedai, gudang atau bangunan atau tempat lain itu kuasa-kuasa yang disebut dalam seksyen 21 itu dengan suatu cara yang sepuuh dan secukupnya seolah-olah dia telah diberi kuasa untuk berbuat demikian oleh waran yang dikeluarkan di bawah seksyen itu.

23. (1) Mana-mana pegawai kastam boleh menahan dan memeriksa mana-mana kenderaan dalam suatu zon bebas bagi maksud menentukan sama ada apa-apa barang-barang yang mungkin menjadi subjek sesuatu kesalahan di bawah Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Akta ini atau di bawah mana-mana peraturan yang dibuat di bawahnya ada terkandung di dalamnya, dan orang yang mengawal atau menjaga kenderaan itu hendaklah jika dikehendaki berbuat demikian oleh pegawai itu menghentikan kenderaan itu dan membenarkan pegawai itu memeriksanya atau memindah kenderaan itu ke suatu tempat lain untuk pemeriksaan, dan tidak boleh meneruskan perjalanan sehingga kebenaran bagi berbuat demikian itu telah diberi oleh pegawai itu.

Pegawai-pegawai kastam boleh menahan dan menggeledah kenderaan.

(2) Orang yang mengawal atau menjaga mana-mana kenderaan yang diberhentikan untuk pemeriksaan di bawah subseksyen (1) hendaklah jika dikehendaki oleh pegawai kastam itu membuka semua bahagian kenderaan itu untuk pemeriksaan oleh pegawai itu dan hendaklah mengambil semua langkah yang perlu untuk membolehkan pemeriksaan itu dibuat sebagaimana dianggap perlu oleh pegawai itu.

Kuasa untuk membuka bungkusan dan memeriksa barang-barang.

24. Mana-mana pegawai kastam yang hak boleh dalam suatu zon bebas memeriksa apa-apa barang-barang yang dibawa ke dalam atau yang dipindah keluar dari suatu zon bebas atau yang dicadangkan untuk dibawa ke dalam atau keluar dari suatu zon bebas dan bagi maksud pemeriksaan itu mengarahkan barang-barang itu dibawa ke pejabat kastam atau balai kastam dan dia boleh membuka apa-apa bungkusan atau bekas.

Pemeriksaan orang-orang yang memasuki atau keluar dari zon bebas.

25. Mana-mana orang yang mendarat, atau hampir akan mendarat atau setelah baru sahaja mendarat di suatu zon bebas, dari mana-mana vesel atau pesawat udara, sama ada bagi maksud mendarat atau selainnya, atau memasuki atau setelah baru sahaja memasuki suatu zon bebas melalui jalan atau keretapi atau keluar atau hampir hendak keluar dari suatu zon bebas dari mana-mana vesel atau pesawat udara, melalui jalan atau keretapi hendaklah, jika dikehendaki sedemikian oleh mana-mana pegawai kastam yang hak, membenarkan sama ada dirinya, barang-barang dan begasinya diperiksa oleh pegawai itu atau bersama-sama dengan barang-barang dan begasi itu pergi bersama-sama pegawai itu ke pejabat kastam atau balai kastam atau balai polis dan di sana membenarkan dirinya, barang-barang dan begasinya diperiksa oleh seorang pegawai kastam:

Dengan syarat bahawa—

- (a) mana-mana orang yang meminta supaya dirinya diperiksa di hadapan seorang pegawai kastam tidak boleh diperiksa kecuali di hadapan dan di bawah penyeliaan pegawai itu, dan orang itu boleh ditahan sehingga ketibaan pegawai itu atau dibawa masuk ke mana-mana pejabat kastam atau balai kastam atau balai polis di mana pegawai itu berada;
- (b) barang-barang dan begasi mana-mana orang yang meminta untuk hadir apabila barang-barang dan begasinya digeledah dan jika menghadirkan dirinya dalam masa yang munasabah tidak boleh diperiksa kecuali dengan kehadirannya; dan

- (c) tiada seorang perempuan pun boleh diperiksa kecuali oleh seorang pegawai kastam atau pegawai polis perempuan.

25. (1) Semua barang-barang yang dikenakan dengannya apa-apa kesalahan telah, atau ada sebab yang munasabah bagi mempercayai bahawa apa-apa kesalahan telah, dilakukan terhadap, atau apa-apa pelanggaran terhadap, Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Akta ini atau mana-mana peraturan yang dibuat di bawahnya atau apa-apa pelanggaran terhadap apa-apa sekatan atau syarat yang tertakluk kepadanya apa-apa lesen, permit atau kebenaran yang telah diberi di bawah mana-mana undang-undang itu, bersama-sama dengan apa-apa bekas, begasi, bungkusan, kenderaan, vesel (tidak melebihi daripada satu ratus lapan puluh dua tan bersih berdaftar), atau pesawat udara selain daripada pesawat udara yang digunakan bagi pengangkutan antarabangsa, yang mana barang-barang itu mungkin dijumpai atau digunakan berhubungan dengan kesalahan atau pelanggaran itu, dan apa-apa buku atau dokumen yang dengan munasabahnya dipercayai sebagai mempunyai kaitan terhadap kes itu, boleh disita oleh mana-mana pegawai kastam dalam suatu zon bebas.

Penyitaan barang-barang yang menjadi subjek sesuatu kesalahan.

(2) Semua barang-barang dan bekas, begasi, bungkusan, kenderaan, vesel atau pesawat udara itu hendaklah, dengan seberapa segera yang mungkin yang sesuai, diserahkan ke dalam jagaan seorang pegawai kastam yang hak yang tugasnya adalah untuk menerimanya.

(3) Apabila apa-apa barang-barang, bekas, begasi, kenderaan, vesel atau pesawat udara disita di bawah Akta ini, pegawai yang menyitanya itu hendaklah dengan serta-merta memberi kepada pemunyaanya, jika diketahui, notis bertulis tentang penyitaan itu serta

alasan-alasannya sama ada dengan menyerahkan notis itu kepadanya sendiri atau melalui pos di tempat kediamannya, jika diketahui:

Dengan syarat bahawa notis itu tidaklah dikehendaki diberi jika penyitaan itu dibuat ke atas orang itu, atau di hadapan pesalah atau pemunya atau ejen-ejennya dan, dalam hal sesebuah vesel atau pesawat udara, di hadapan nakhoda atau juruterbangnya, mengikut mana-mana yang berkenaan.

(4) Peruntukan seksyen ini berhubungan dengan penyitaan barang-barang hendaklah terpakai bagi semua kandungan apa-apa bungkusan atau bekas yang disita dan bagi apa-apa artikel yang digunakan untuk menyembunyikan kandungan itu.

(5) Peruntukan seksyen ini berhubungan dengan penyitaan mana-mana vesel atau pesawat udara hendaklah terpakai juga bagi takal, kelengkapan dan perkakas vesel atau pesawat udara itu.

(6) Peruntukan seksyen ini berhubungan dengan penyitaan kenderaan hendaklah terpakai bagi semua kelengkapannya.

Pemulangan  
atau pelu-  
pusan harta  
alih.

27. (1) Jika mana-mana harta alih telah disita di bawah Akta ini, seseorang pegawai kanan kastam boleh, mengikut budi bicaranya—

(a) memulangkan harta alih itu secara sementara kepada pemunya atau kepada orang yang daripada milikan, jagaan atau kawalannya harta alih itu disita, atau kepada mana-mana orang yang dianggap oleh pegawai kanan kastam itu sebagai berhak terhadap harta alih itu tertakluk kepada apa-apa terma dan syarat yang boleh dikenakan dan, dalam apa-apa hal, tertakluk kepada pemberian cagaran yang mencukupi dengan memuaskan hati pegawai kanan kastam itu bahawa harta alih itu akan diserahkan kepada seseorang pegawai kanan

kastam apabila diminta dan bahawa terma dan syarat tersebut, jika ada, hendaklah dipatuhi; atau

(b) memulangkan harta alih itu kepada pemunya-nya atau kepada orang yang daripada milikan, jagaan, atau kawalannya harta alih itu disita, atau kepada mana-mana orang yang dianggap oleh pegawai kanan kastam itu sebagai berhak terhadap harta alih itu, dengan kebebasan bagi orang yang kepadanya harta alih itu dipulangkan untuk melupuskannya, pemulangan itu adalah tertakluk kepada pemberian cagaran sehingga memuaskan hati pegawai kanan kastam itu dalam amaun tidak kurang daripada amaun yang pada pendapat pegawai kanan kastam itu, menunjukkan—

(i) nilai pasaran terbuka harta itu pada tarikh dipulangkan;

(ii) duti kastam yang kena dibayar berkenaan dengannya; dan

(iii) apa-apa cukai yang kena dibayar berkenaan dengannya di bawah mana-mana undang-undang bertulis,

bagi pembayaran amaun yang dicagarkan itu kepada Ketua Pengarah sekiranya mahkamah membuat suatu perintah bagi melucuthakkan amaun itu di bawah seksyen 39; atau

(c) menjual atau memusnahkan harta alih itu, mengikut mana-mana yang sesuai dalam hal keadaan itu, jika ia suatu benda hidup atau jika, pada pendapat pegawai kanan kastam itu, ia dari jenis yang mudah musnah atau merbahaya atau mungkin merosot dengan cepat dari segi kualiti atau nilai, dan jika ia dijual sedemikian, dia hendaklah memegang hasil jualan itu sementara menunggu keputusan apa-apa pendakwaan atau tuntutan dan berkaitan dengan hasil jualan itu untuk mematuhi keputusan pendakwaan atau tuntutan itu.

(2) Mana-mana orang yang—

- (a) gagal untuk menyerahkan kepada pegawai kanan kastam apabila diminta harta alih yang dipulangkan secara sementara di bawah perenggan (a) subseksyen (1); atau
- (b) gagal untuk mematuhi atau melanggar apa-apa terma atau syarat yang dikenakan di bawah perenggan (a) subseksyen (1),

adalah melakukan suatu kesalahan dan bolehlah, apabila disabitkan, dikenakan hukuman penjara bagi suatu tempoh tidak melebihi tiga tahun atau denda tidak melebihi sepuluh ribu ringgit atau kedua-duanya.

(3) Liabiliti jenayah bagi mana-mana orang di bawah subseksyen (2) adalah sebagai tambahan kepada apa-apa liabiliti lain yang orang tersebut atau mana-mana orang lain boleh menanggung di bawah terma dan syarat yang berkaitan dengan pemulangan harta alih itu di bawah perenggan (a) subseksyen (1).

(4) Peruntukan-peruntukan subseksyen (2) tidaklah terpakai bagi mana-mana orang, jika ada, yang menjadi penggerenti atau penjamin kepada orang yang kepadanya harta itu dipulangkan di bawah perenggan (a) subseksyen (1).

(5) Menteri boleh, dari semasa ke semasa, sama ada secara am atau dalam mana-mana hal atau kelas hal tertentu, memberi arahan kepada Ketua Pengarah sebagaimana yang disifatkannya perlu atau suaimanfaat berkenaan dengan penggunaan kuasa yang diberi kepada seseorang pegawai kanan kastam di bawah subseksyen (1).

(6) Tiada seorang pun berhak mengambil apa-apa tindakan atas sebab apa-apa perbuatan yang dilakukan oleh atau apa-apa keputusan yang dibuat oleh atau bagi pihak Menteri atau oleh atau bagi pihak seseorang pegawai kanan kastam di bawah seksyen ini, dan tiada mahkamah boleh mempunyai apa-apa bidang kuasa untuk mendengar mana-mana tindakan sedemikian.

28. Mana-mana pegawai kastam boleh menangkap tanpa waran dalam suatu zon bebas— Kuasa tangkapan.

- (a) mana-mana orang yang didapati melakukan atau cuba hendak melakukan, atau mengambil kerja atau menolong mana-mana orang untuk melakukan atau bersubahat melakukan, suatu kesalahan terhadap Akta ini atau mana-mana peraturan yang dibuat di bawahnya;
- (b) mana-mana orang yang disyaki semunasabahnya sebagai mempunyai dalam milikannya apa-apa barang-barang yang boleh disita di bawah Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975, Akta ini atau mana-mana peraturan yang dibuat di bawahnya; atau
- (c) mana-mana orang yang terhadapnya wujud syak yang munasabah bahawa dia telah melakukan suatu kesalahan terhadap Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975, Akta ini atau mana-mana peraturan yang dibuat di bawahnya,

dan boleh memeriksa atau menyebabkan diperiksa mana-mana orang yang ditangkap sedemikian:

Dengan syarat bahawa tiada seorang perempuan pun boleh diperiksa kecuali oleh seorang pegawai kastam atau pegawai polls perempuan.

29. (1) Seseorang pegawai kastam yang membuat tangkapan tanpa waran hendaklah, tanpa kelengahan yang tidak perlu dan tertakluk kepada peruntukan-peruntukan Akta ini, tentang jaminan atau pelepasan yang terdahulu, membawa atau menghantar orang yang ditangkap itu ke mahkamah Majistret. Peruntukan-peruntukan berkaitan dengan penangkapan tanpa waran.

(2) Tiada seorang pegawai kastam pun boleh menahan dalam jagaan seseorang yang ditangkap tanpa waran bagi suatu tempoh yang lebih lama daripada yang di bawah hal keadaan kes itu adalah munasabah; dan tempoh itu tidak boleh melebihi dua puluh empat

jam tidak termasuk masa yang diperlukan untuk perjalanan dari tempat tangkapan itu ke mahkamah Majistret itu.

(3) Tiada seorang pun yang telah ditangkap oleh seorang pegawai kastam boleh dilepaskan kecuali atas bonnya sendiri atau jaminan atau di bawah suatu perintah khas bertulis oleh seorang Majistret atau seorang pegawai kanan kastam.

Siapa yang boleh mendakwa.

**30.** Pendakwaan berkenaan dengan kesalahan-kesalahan yang dilakukan di bawah—

(a) seksyen 5 dan 8 Akta ini boleh dijalankan oleh seorang pegawai kanan kastam atau oleh mana-mana pegawai kastam yang diberikuasa khas secara bertulis bagi maksud itu oleh Ketua Pengarah; dan

(b) mana-mana peruntukan lain Akta ini atau mana-mana peraturan yang dibuat di bawahnya boleh dijalankan oleh seorang pegawai bagi Pihak Berkuasa, yang diberikuasa khas atau am secara bertulis bagi maksud itu oleh Menteri.

Perлиндungan bagi pemberi maklumat daripada diketahui.

**31.** (1) Kecuali sebagaimana yang diperuntukkan kemudian daripada ini, tiada seorang saksi pun dalam mana-mana presiding sivil atau jenayah menurut Akta ini adalah diwajibkan atau dibenarkan untuk mendedahkan nama atau alamat pemberi maklumat atau substans maklumat yang diterima daripadanya atau untuk menyatakan apa-apa perkara yang boleh membawa kepada nama atau alamat pemberi maklumat itu diketahui.

(2) Jika apa-apa buku, dokumen atau kertas yang menjadi keterangan atau yang boleh diperiksa dalam mana-mana presiding sivil atau jenayah mengandungi apa-apa Catalan atau petikan yang di dalamnya mana-mana pemberi maklumat ada dinamakan atau diperihalkan atau yang mungkin membawa kepada diketahui siapa pemberi maklumat itu, maka mahkamah hendaklah menyebabkan segala catatan atau petikan

tersebut disembunyikan daripada pandangan atau dipadamkan setakat yang perlu sahaja untuk melindungi pemberi maklumat itu daripada diketahui.

(3) Jika dalam perbicaraan bagi mana-mana kesalahan terhadap Akta ini atau mana-mana peraturan yang dibuat di bawahnya, mahkamah, selepas siasatan penuh ke atas kes itu, mempercayai bahawa pemberi maklumat itu dengan sengaja membuat dalam pengaduannya suatu pernyataan material yang diketahuinya atau dipercayainya sebagai palsu atau tidak mempercayainya sebagai benar, atau jika dalam mana-mana prosiding lain mahkamah adalah berpendapat bahawa keadilan tidak dapat dilakukan dengan sepenuhnya di antara pihak-pihak dalam presiding itu tanpa diketahui pemberi maklumat itu, adalah sah bagi mahkamah menghendaki supaya ditunjukkan pengaduan asal, jika bertulis, dan membenarkan siasatan, dan menghendaki pendedahan sepenuhnya berkaitan dengan pemberi maklumat itu.

32. (1) Jika sesuatu kesalahan terhadap Akta ini atau mana-mana peraturan yang dibuat di bawahnya telah dilakukan oleh suatu syarikat, firma, pertubuhan atau lain-lain kumpulan orang, mana-mana orang yang pada masa berlakunya kesalahan itu menjadi pengarah, pengurus, setiausaha atau lain-lain pegawai yang serupa bagi syarikat, pertubuhan atau lain-lain kumpulan orang itu, pekongsi atau pengurus firma itu atau, mana-mana orang lain yang berupa sebagai bertindak atas apa-apa sifat yang sedemikian atau, mana-mana orang yang mempunyai tanggungjawab atau kawalan ke atas syarikat, firma, pertubuhan atau lain-lain kumpulan orang itu hendaklah disifatkan sebagai bersalah kerana melakukan kesalahan itu, melainkan jika dia membuktikan bahawa kesalahan itu telah dilakukan tanpa persetujuannya atau pembiarannya dan bahawa dia telah menjalankan segala usaha untuk mengelakkan berlakunya kesalahan itu sebagaimana yang patut dijalankan olehnya, memandangkan kepada jenis fungsi-fungsinya atas sifat itu dan kepada segala hal keadaan.

Kesalahan oleh kumpulan orang, dan oleh pengkhidmat-pengkhidmat dan ejen-ejen.

(2) Jika mana-mana orang boleh dikenakan di bawah Akta ini apa-apa hukuman, penalti atau perlucuthakan kerana apa-apa perbuatan, peninggalan, pengabaian atau keingkaran, maka dia boleh dikenakan hukuman, penalti atau perlucuthakan yang sama bagi tiap-tiap perbuatan, peninggalan, atau keingkaran yang dilakukan oleh mana-mana kerani, pengkhidmat atau ejennya, atau oleh kerani atau pengkhidmat bagi ejen itu dengan syarat bahawa perbuatan, peninggalan, pengabaian atau keingkaran itu dilakukan oleh kerani atau pengkhidmat itu dalam perjalanan pekerjaannya atau oleh ejen itu ketika bertindak bagi pihak orang itu atau oleh kerani atau pengkhidmat bagi ejen itu ketika bertindak dalam perjalanan pekerjaannya dalam hal keadaan di mana jika perbuatan, peninggalan, pengabaian atau keingkaran itu dilakukan oleh ejen itu, prinsipalnya akan bertanggungjawab di bawah seksyen ini.

Meng-  
kompaun  
kesalahan.

33. (1) Mana-mana pegawai kanan kastam boleh mengkompaun apa-apa kesalahan di bawah Akta ini yang ditetapkan sebagai suatu kesalahan yang boleh dikompaun dengan menghendaki orang yang semunasabahnya disyaki telah melakukan kesalahan itu membayar sejumlah wang tidak lebih daripada lima ribu ringgit.

(2) Apabila jumlah wang yang sedemikian dibayar, orang yang semunasabahnya disyaki telah melakukan suatu kesalahan, jika dia berada dalam jagaan, hendaklah dilepaskan, dan apa-apa harta yang telah disita hendaklah dilepaskan dan tiada prosiding selanjutnya boleh diambil terhadap orang atau harta itu, melainkan jika harta itu terdiri daripada barang-barang yang pengimportannya ke dalam Malaysia dilarang secara mutlak atau bersyarat di bawah mana-mana undang-undang bertulis dan tiada lesen import dikeluarkan, maka jika dalam hal sedemikian, barang-barang itu hendaklah dilucuthak.

Perlin-  
dungan  
bagi  
Kerajaan  
daripada  
liabttiti.

34. Kerajaan atau Pihak Berkuasa, mengikut mana-mana yang berkenaan, adalah tidak bertanggungjawab untuk membayar apa-apa kerugian yang dialami berkenaan dengan apa-apa barang-barang kerana kebakaran, kecurian, kerosakan atau sebab-sebab lain

semasa barang-barang itu berada di mana-mana gudang kastam atau dalam jagaan atau kawalan sah mana-mana pegawai kastam atau pekerja Pihak Berkuasa melainkan jika kerugian itu disebabkan oleh kecuaiian bersengaja, atau keingkaran seseorang pegawai kastam atau seseorang yang diambil kerja oleh Kerajaan atau Pihak Berkuasa.

35. Tiada seorang pegawai kastam pun atau orang lain yang diambil kerja oleh Kerajaan yang berkaitan dengan kastam boleh bertanggungjawab untuk membayar apa-apa kerugian yang dialami berkenaan dengan apa-apa barang-barang kerana kebakaran, kecurian, kerosakan atau sebab-sebab lain semasa barang-barang itu berada di mana-mana gudang kastam atau dalam jagaan atau kawalan sah pegawai itu atau mana-mana pegawai kastam lain atau orang yang di ambil kerja berhubungan dengan kastam melainkan jika kerugian itu disebabkan oleh kecuaiian bersengaja atau keingkarnya.

Perlin-  
dungan  
bagi  
pegawai  
kastam  
daripada  
liabiliti.

36. Tiada seorang pun dalam mana-mana presideng di mana-mana mahkamah berkenaan dengan penyitaan apa-apa barang-barang yang disita pada menjalankan atau berupa sebagai menjalankan apa-apa kuasa yang diberi di bawah Akta ini berhak terhadap kos prosiding itu atau apa-apa ganti rugi atau relief lain kecuali suatu perintah bagi pemulangan barang-barang itu atau pembayaran nilainya melainkan jika penyitaan itu dibuat tanpa sebab yang munasabah atau sebab yang mungkin.

Tiada kos  
atau ganti  
rugi boleh  
didapati  
melainkan penyitaan  
dibuat  
tanpa  
sebab  
yang  
munasabah  
atau sebab  
yang  
mungkin.

37. Tiada apa-apa jua dalam Akta ini boleh menghalang mana-mana orang daripada didakwa di bawah mana-mana undang-undang bertulis bagi apa-apa perbuatan, peninggalan, pengabaian, keingkaran yang menjadikan suatu kesalahan di bawah Akta ini atau mana-mana peraturan yang dibuat di bawahnya, atau boleh dikenakan di bawah undang-undang bertulis lain apa-apa hukuman atau penalti yang lebih berat atau selain daripada yang diperuntukkan oleh Akta ini atau mana-mana peraturan yang dibuat di bawahnya.

Sabitin  
di bawah  
undang-  
undang  
bertulis  
yang lain.

Barang-barang yang boleh dilucuthak.

38. Semua barang-barang yang disita di bawah Akta ini bolehlah dilucuthakkan.

Mahkamah hendaklah memerintah perlucuthakan dan pelupusan barang-barang yang disita.

39. (1) Suatu perintah bagi melucuthakkan atau bagi melepaskan apa-apa benda yang boleh dilucuthak di bawah peruntukan-peruntukan Akta ini hendaklah dibuat oleh Mahkamah yang di hadapannya pendakwaan tentangnya telah diadakan, dan suatu perintah bagi melucuthak barang-barang itu hendaklah dibuat jika dibuktikan dengan memuaskan hati Mahkamah bahawa suatu kesalahan terhadap Akta ini atau mana-mana peraturan yang dibuat di bawahnya telah dilakukan dan bahawa barang-barang itu adalah hal-perkara, atau digunakan dalam melakukan, kesalahan itu walaupun tiada seorang pun mungkin disabitkan atas kesalahan itu.

(2) Mahkamah hendaklah memerintah perlucuthakan—

- (a) dalam hal barang-barang yang dipulangkan di bawah perenggan (b) subseksyen (1) seksyen 27 dan kemudiannya dilupuskan oleh pemunya atau oleh orang yang kepadanya ia dipulangkan, amaun yang dicagarkan di bawah perenggan itu;
- (b) dalam hal barang-barang yang dijual menurut perenggan (c) subseksyen (1) seksyen 25, amaun yang dihasilkan dari jualan itu,

jika ia dibuktikan dengan memuaskan hati Mahkamah bahawa suatu kesalahan terhadap Akta ini atau mana-mana peraturan yang dibuat di bawahnya telah dilakukan dan harta alih berkenaan dengan mana amaun itu dicagarkan atau dihasilkan oleh jualan, mengikut mana-mana yang berkenaan, adalah hal perkara atau digunakan dalam melakukan kesalahan itu walaupun tiada seorang pun mungkin disabitkan atas kesalahan itu.

(3) Semua benda yang dilucuthak hendaklah diserahkan kepada pegawai kastam yang hak dan hendaklah dilupuskan mengikut arahan Ketua Pengarah.

40. (1) Jika tiada apa-apa pendakwaan dibuat berkenaan dengan apa-apa barang-barang yang disita di bawah Akta ini, barang-barang itu hendaklah diambil dan disifatkan sebagai terlucuthak apabila tamatnya satu bulan kalendar dari tarikh penyitaan melainkan jika suatu tuntutan terhadapnya dibuat sebelum tarikh tersebut mengikut cara yang dinyatakan kemudian daripada ini.

Barang-barang yang disita yang herkenaan dengannya tiada apa-apa pendakwaan.

(2) Mana-mana orang yang mendakwa bahawa dia adalah pemunya barang-barang itu dan bahawa barang-barang itu tidak boleh dilucuthak boleh dengan sendiri atau melalui ejennya yang diberikuasa secara bertulis memberi notis bertulis kepada seorang pegawai kanan kastam menyatakan bahawa dia menuntut barang-barang itu.

(3) Atas penerimaan notis sedernikian pegawai kanan kastam itu hendaklah merujukkan tuntutan itu kepada Ketua Pengarah yang boleh mengarahkan supaya barang-barang itu dilepaskan atau boleh mengarahkan pegawai kanan kastam itu, melalui maklumat dalam borang yang ditetapkan, merujuk perkara itu kepada seorang Majistret Kelas Satu untuk keputusannya.

(4) Majistret Kelas Satu hendaklah mengeluarkan suatu saman menghendaki orang yang menyatakan bahawa dia adalah pemunya barang-barang itu dan orang daripadanya barang-barang itu telah disita supaya hadir di hadapannya, dan atas kehadiran atau keingkarannya mereka untuk hadir, penyampaian sempurna saman itu telah dibuktikan, Majistret itu hendaklah menjalankan pemeriksaan perkara itu dan, apabila dibuktikan bahawa suatu kesalahan terhadap Akta ini telah dilakukan dan bahawa barang-barang itu telah menjadi hal-perkara, atau digunakan dalam melakukan kesalahan itu, hendaklah memerintahkan

supaya barang-barang itu dilucuthak, atau boleh tanpa bukti sedemikian memerintahkan barang-barang itu dilepaskan.

Barang-barang yang disita boleh diserahkan kepada pemunya atau orang lain.

**41.** Menteri boleh, apabila permohonan bertulis dibuat kepadanya melalui Ketua Pengarah, memerintahkan apa-apa barang-barang yang disita di bawah Akta ini, sama ada dilucuthak, atau diambil dan disifatkan sebagai terlucuthak, supaya diserahkan kepada pemunya atau orang lain yang berhak terhadapnya, atas apa-apa terma dan syarat yang disifatkan patut:

Dengan syarat bahawa apa-apa permohonan sedemikian hendaklah dibuat sebelum tamatnya satu bulan kalendar dari tarikh perlucuthakkan barang-barang atau dari tarikh barang-barang itu diambil dan disifatkan sebagai terlucuthak, mengikut mana-mana yang berkenaan.

## BAHAGIAN V

### PERUNTUKAN-PERUNTUKAN PELBAGAI

Vesel berkaitan dengan zon bebas.

**42.** Mana-mana vesel yang ditambat di sepanjang tepi dermaga sesuatu zon bebas hendaklah disifatkan sebagai berada dalam zon bebas itu.

Pegawai kastam yang hak boleh mengambil sampel.

**43.** (1) Pegawai kastam yang hak boleh pada bila-bila masa mengambil sampel mana-mana barang-barang bagi menentukan sama ada barang-barang itu adalah jenis yang boleh dikenakan apa-apa duti kastam atau bagi menentukan duti kastam atas barang-barang itu apabila masuk ke dalam kawasan utama kastam atau bagi apa-apa maksud lain yang disifatkan perlu oleh pegawai kastam yang hak itu, dan sampel-sampel itu boleh dilupuskan mengikut cara yang diarahkan oleh Ketua Pengarah.

(2) Tiada apa-apa bayaran boleh dibuat bagi apa-apa sampel yang diambil tetapi pegawai kastam yang hak itu hendaklah memberi suatu resit bagi apa-apa sampel yang diambil.

44. Anggota-anggota Pihak Berkuasa dan pekerja-pekerjanya dari apa-apa jawatan ketika menjalankan fungsi mereka atau menjalankan tugas mereka di bawah Akta ini hendaklah disifatkan sebagai pengkhidmat awam bagi maksud Kanun Keseksaan.

Pengkhidmat awam

*F.M.S.  
Cap. 45.*

45. Ketua Pengarah boleh memerintahkan supaya apa-apa upah sebagaimana yang disifatkannya patut dibayar kepada mana-mana pegawai kastam atau orang lain bagi perkhidmatan yang diberi berhubungan dengan pengesanan kes-kes penyeludupan atau kesalahan-kesalahan di bawah Akta ini, atau berhubungan dengan apa-apa penyitaan yang dibuat di bawah Akta ini.

Upah.

46. Jika diperuntukkan dalam Akta ini atau mana-mana peraturan yang dibuat di bawahnya bahawa keputusan mengenai apa-apa perkara terserah kepada Pihak Berkuasa atau Ketua Pengarah, maka melainkan jika ia diperuntukkan dengan khususnya bahawa keputusan itu adalah menurut budi bicara mutlak Pihak Berkuasa atau Ketua Pengarah itu, mana-mana orang yang terkilang dengan keputusan itu bolehlah merayu kepada Menteri.

Rayuan atas keputusan Pihak Berkuasa atau Ketua Pengarah.

47. Menteri boleh membuat peraturan-peraturan sebagaimana yang perlu atau suaimanfaat bagi memberi kesan kepada peruntukan-peruntukan Akta ini atau bagi melaksanakan maksud Akta ini.

Kuasa membuat peraturan-peraturan.

48. Menteri boleh berkenaan dengan sesuatu zon bebas, mewakilkan kepada mana-mana orang semua atau mana-mana kuasanya di bawah peruntukan-peruntukan Akta ini, kecuali kuasa di bawah seksyen 10 (2) dan seksyen 47.

Kuasa unluk mewakil.

## BAHAGIAN VI

### PINDAAN-PINDAAN DAN PEMANSUHAN

49. (1) Akta-akta yang dinyatakan dalam ruang pertama Jadual Ketiga adalah dimansuhkan atau dipinda sebagaimana yang berkenaan, setakat yang ditunjukkan dalam ruang kedua Jadual yang sama.

Pindaan-pindaan dan pemansuhan.

Zon perdagangan bebas disifatkan sebagai zon perindustrian bebas. *Akta 24.*

50. Mana-mana zon perdagangan bebas yang diisytiharkan di bawah seksyen 3 Akta Zon Perdagangan Bebas 1971, dan yang masih berkuatkuasa sebelum sahaja mula berkuatkuasanya Akta ini hendaklah disifatkan sebagai zon perindustrian bebas yang diisytiharkan di bawah seksyen 3 Akta ini sehingga dibatalkan oleh Menteri.

Menteri boleh membatalkan mana-mana pengisytiharan atau perintah.

51. Menteri boleh membatalkan mana-mana perisytiharan atau perintah yang dibuat di bawah Akta ini atau mana-mana undang-undang bertulis yang dimansuhkan oleh Akta ini berkenaan dengan mana-mana zon bebas:

Dengan syarat bahawa mana-mana perintah pembatalan yang dibuat di bawah seksyen ini, jika ia mempunyai kesan menghapuskan mana-mana zon bebas yang diisytiharkan itu, hendaklah membenarkan masa yang mencukupi bagi orang-orang dalam zon bebas yang terlibat secara langsung dengan perintah itu membuat persiapan bagi pelupusan barang-barang mereka.

#### JADUAL PERTAMA

[Seksyen 10(1) (a)]

(1) Nama bagi Zon Perdagangan Bebas	(2) Aktiviti-aktiviti
1. <i>Mukim Plentong, Daerah Johor Bahru:</i>	Perdagangan tidak termasuk perusahaan
Semua tanah yang terletak dalam Mukim Plentong dalam Daerah Johor Bahru, yang dilingkungi dengan garisan kelabu yang ditunjukkan dalam Pelan <i>Warta</i> 1709 yang disimpan di Pejabat Pengarah Ukur, Johor.	
2. <i>Kawasan Bebas Cukai Pengkalan Kubor:</i>	Perusahaan
Semua kawasan berpagar yang mengandungi Lot. No. 752 hingga 759, 761 hingga 784, kawasan	

(D)  
Nama bagi Zon Perindustrian  
Bebas

(2)  
Aktiviti-aktiviti

kedai dan kawasan-kawasan yang lain di dalamnya, Mukim Pengkalan Kubor, dalam jajahan Tumpat, Kelantan.

3. *Bukit Kayu tiitam:* Perusahaan

Lot No. (Ft. 1443) Pekan Bukit Kayu Hitam, Mukim Sungai Laka, Daerah Kubang Pasu, Kedah.

JADUAL KEDUA

[Seksyen 10 (1) (b)]

(1)  
Nama bagi Zon Perindustrian  
Bebas

(2)  
Aktiviti-aktiviti

1. *Mukim Plentong, Johor Bahru:* Pengilangan

Semua tanah yang terletak dalam Mukim Plentong dalam Daerah Johor Bahru, yang dilingkungi dengan garisan kelabu yang ditunjukkan dalam Pelan *Warta* 1709 yang disimpan di Pejabat Pengarah Ukur, Johor.

2. *Mukim Pringgit, Daerah Tengah, Melaka:* Pengilangan

Semua tanah yang terletak dalam Mukim Pringgit, Daerah Tengah Melaka, yang dilingkungi dengan garisan kelabu yang ditunjukkan dalam Pelan *Warta* PG 109 yang disimpan di Pejabat Pengarah Ukur, Melaka.

3. *Mukim Tanjung Kling, Melaka:* Pengilangan

Semua tanah yang terletak dalam Mukim Tanjung Kling, Daerah Tengah Melaka, yang dilingkungi dengan garisan kelabu yang ditunjukkan dalam Pelan *Warta* PG 103 yang disimpan di Pejabat Pengarah Ukur, Melaka.

- | (1)   | (2)               |
|---|-------------------|
| Nama bagi Zon Perindustrian Bebas   | Aktiviti-aktiviti |
| 4. <i>Mukim Pringgit dan Bukit Baru, Daerah Tengah, Melaka:</i>   | Pengilangan       |
| <p>Semua tanah yang terletak dalam Mukim Pringgit dan Bukit Baru, Daerah Tengah Melaka, yang dilingkungi dengan garisan kelabu yang ditunjukkan dalam Pelan <i>Warta</i> PG 108 yang disimpan di Pejabat Pengarah Ukur, Melaka.</p>       |                   |
| 5. <i>Mukim Hulu Kinta, Daerah Kinta, Perak:</i>  | Pengilangan       |
| <p>Semua tanah yang terletak dalam Mukim Hulu Kinta, Daerah Kinta, yang dilingkungi dengan garisan kelabu yang ditunjukkan dalam Pelan <i>Warta</i> 870 yang disimpan di Pejabat Pengarah Ukur, Perak.</p>                                |                   |
| 6. <i>Telok Panglima Garang, Daerah Kuala Langat, Selangor:</i>   | Pengilangan       |
| <p>Semua tanah yang terletak dalam Mukim Telok Panglima Garang, Daerah Kuala Langat, Selangor, yang dilingkungi dengan garisan kelabu yang ditunjukkan dalam Pelan <i>Warta</i> 440 yang disimpan di Pejabat Pengarah Ukur, Selangor.</p> |                   |
| 7. <i>Mukim Ulu Klang, Daerah Gombak, Selangor:</i>   | Pengilangan       |
| <p>Semua tanah yang terletak dalam Mukim Ulu Klang, Daerah Gombak, Selangor yang dilingkungi dengan garisan kelabu yang ditunjukkan dalam Pelan <i>Warta</i> 439 yang disimpan di Pejabat Pengarah Ukur, Selangor.</p>                    |                   |

- | (1)<br>Nama bagi Zon Perindustrian<br>Bebas  | (2)<br>Aktiviti-aktiviti |
|--|--------------------------|
| 8. <i>Mukim Damansara, Daerah Klang, Selangor:</i>   | Pengilangan              |
| <p>Semua tanah yang terletak dalam Mukim Damansara, Daerah Klang, Selangor yang dilingkungi dengan garisan kelabu yang ditunjukkan dalam Pelan Warta 375 yang disimpan di Pejabat Pengarah Ukur, Selangor.</p> |                          |
| 9. <i>Prai, Daerah Tengah Seberang Prai, Mukim 1, Pulau Pinang:</i>  | Pengilangan              |
| <p>Semua tanah yang dilingkungi dengan garisan kelabu yang ditunjukkan dalam Pelan Warta 290 yang disimpan di Pejabat Pengarah Ukur, Pulau Pinang.</p>   |                          |
| 10. <i>Bayan Lepas, Daerah Barat Daya, Mukim 12, Pulau Pinang:</i>   | Pengilangan              |
| <p>(i) Semua tanah yang dilingkungi dengan garisan kelabu yang ditunjukkan dalam Pelan Warta 138 yang disimpan di Pejabat Pengarah Ukur, Pulau Pinang.</p>   |                          |
| <p>(ii) Semua tanah yang dilingkungi dengan garisan kelabu yang ditunjukkan dalam Pelan Warta 281 yang disimpan di Pejabat Pengarah Ukur, Pulau Pinang.</p>  |                          |
| <p>(iii) Semua tanah yang dilingkungi dengan garisan kelabu yang ditunjukkan dalam Pelan Warta 289 yang disimpan di Pejabat Pengarah Ukur, Pulau Pinang.</p>   |                          |

## JADUAL KETIGA

(Seksyen 49)

## Pindaan dan Pemansuhan

(1) Akta	(2) Pindaan
Akta Kastam 1967	<p>Seksyen 2 adalah dipinda dengan menggantikan subseksyen (1A) dengan subseksyen (1A) baru yang berikut:</p> <p style="padding-left: 40px;">" (1A) For the purposes of this Act (other than section 31), a free zone shall be deemed to be a place outside Malaysia.</p> <p style="padding-left: 40px;">In this subsection the expression "free zone" has the meaning assigned to it under section 2 of the Free Zone Act 1990."</p>
Akta Eksais 1976	<p>Subseksyen (1) seksyen 2 adalah dipinda dengan menggantikan takrif "zon perdagangan bebas" dengan takrif baru yang berikut:</p> <p style="padding-left: 40px;">" "zon bebas" mempunyai pengertian yang diberikan kepadanya di bawah seksyen 2 Akta Zon Bebas 1990, dan bagi maksud-maksud Akta ini suatu zon bebas hendaklah disifatkan sebagai suatu tempat di luar Malaysia;"</p>
Akta Cukai Jualan 1972	<p>Seksyen 2A adalah dipinda dengan menggantikannya dengan seksyen 2A baru yang berikut:</p> <p style="padding-left: 40px;">"2A. Bagi maksud-maksud Akta ini, sesuatu zon bebas hendaklah disifatkan sebagai sesuatu tempat di luar Malaysia.</p> <p style="padding-left: 40px;">Dalam seksyen ini, ungkapan "zon bebas" mempunyai pengertian yang diberikan kepadanya di bawah seksyen 2 Akta Zon Bebas 1990."</p>

(1) Akta	(2) Pindaan
Akta Cukai Perkhidmatan 1975	<p>Memasukkan selepas sahaja seksyen 2, seksyen 2A baru yang berikut:</p> <p style="padding-left: 40px;">"2A. Bagi maksud-maksud Akta ini, sesuatu zon bebas hendaklah disifatkan sebagai sesuatu tempat di luar Malaysia.</p> <p style="padding-left: 40px;">Dalam seksyen ini, ungkapan "zon bebas" mempunyai pengertian yang sama dengan pengertian yang diberikan kepadanya di bawah seksyen 2 Akta Zon Bebas 1990."</p>
Akta Penggalakan Pelaburan 1986	<p>(a) Subseksyen (5) seksyen 36 adalah dipinda dengan menggantikan perkataan-perkataan "zon Perdagangan bebas" dengan perkataan-perkataan "Zon Perindustrian Bebas" yang terdapat dalamnya.</p> <p>(b) subseksyen (3) seksyen 36A adalah dipinda dengan menggantikan perkataan-perkataan "Zon Perdagangan Bebas" bagi perkataan-perkataan "Zon Perindustrian Bebas" yang terdapat dalamnya.</p>
Zon Perdagangan Bebas 1971	Dimansuhkan keseluruhannya.

### HURAIAN

Rang Undang-Undang ini bertujuan untuk memperkenalkan suatu undang-undang baru—

- (a) bagi penubuhan zon-zon bebas di Malaysia bagi maksud industri-industri perdagangan dan pengilangan;
- (b) untuk mengadakan peruntukan-peruntukan undang-undang yang sesuai bagi Malaysia menggunakan sebaik-baik kemampuannya dari potensi-potensi ekonomi zon-zon bebas cukai bagi tujuan pembangunan perdagangan dan perindustrian termasuk pelancongan; dan

- (c) untuk menggantikan Akta Zon Perdagangan Bebas 1971 yang ada yang didapati tidak memadai dan tidak berupaya menampung keperluan-keperluan. pembangunan ekonomi semasa yang lebih luas,
2. *Bahagian I* bertujuan untuk memperuntukkan perkara-perkara permulaan.
  3. *Fasal 1* memperuntukkan bagi tajuk ringkas Rang Undang-Undang ini dan juga memperuntukkan bahawa Rang Undang-Undang ini hendaklah mula berkuatkuasanya pada tarikh yang ditetapkan oleh Menteri melalui pemberitahuan dalam *Warta*. Menteri bolehlah menetapkan tarikh-tarikh yang berlainan bagi mula berkuatkuasa peruntukan-peruntukan yang berlainan Rang Undang-Undang ini.
  4. *Fasal 2* mentakrifkan perkataan-perkataan tertentu dan ungkapan-ungkapan yang dipakai dalam Rang Undang-Undang ini.
  5. *Fasal 3* memberikuasa kepada Menteri untuk mengisytiharkan melalui pemberitahuan dalam *Warta* mana-mana kawasan sebagai suatu zon perdagangan bebas atau suatu zon perindustrian bebas dan untuk mentakrifkan had-had zon tersebut. *Fasal* ini juga memberikuasa kepada Menteri untuk melantik mana-mana Jabatan Persekutuan atau Negeri, mana-mana pihak berkuasa berkanun yang diwujudkan oleh suatu undang-undang negeri atau mana-mana syarikat sebagai Pihak Berkuasa untuk mentadbir, menyenggara dan mengendalikan suatu zon bebas.
  6. *Bahagian II* bertujuan untuk memperuntukkan aktiviti-aktiviti yang dibenarkan untuk dijalankan dalam suatu zon bebas.
  7. *Fasal 4* bertujuan untuk memperuntukkan bahawa tertakluk kepada peruntukan-peruntukan Rang Undang-Undang ini, apa-apa jenis barang-barang dan perkhidmatan-perkhidmatan boleh dibawa ke dalam, dihasilkan, dikilang atau dibekalkan dalam suatu zon bebas tanpa bayaran apa-apa duti kastam, duti eksais, cukai jualan atau cukai perkhidmatan, kecuali barang-barang dan perkhidmatan-perkhidmatan yang dilarang secara tertentu dan mutlak oleh undang-undang.
  8. *Fasal 5* adalah berkenaan dengan cara bagaimana barang-barang dalam suatu zon bebas patut diuruskan.
  9. *Fasal 6* memberikuasa kepada Menteri untuk mengecuali apa-apa barang dan perkhidmatan daripada peruntukan-peruntukan *fasal 4* Rang Undang-Undang ini, dan juga memperuntukkan bagi pemakaian undang-undang yang disebut dalam *fasal 6 (2)* berkaitan dengan barang-barang itu.

10. *Fasal 7* bertujuan memperuntukkan bahawa barang-barang yang diambil dari suatu zon bebas dan dibawa ke dalam mana-mana bahagian kawasan utama kastam atau sebaliknya masing-masing hendaklah disifatkan sebagai diimport ke dalam dan dieksport dari Malaysia.

11. *Fasal 8* adalah berkenaan barang-barang yang dikilangkan dalam suatu zon perindustrian bebas.

12. *Fasal 9* bertujuan memperuntukkan penalti bagi kesalahan-kesalahan yang dilakukan terhadap Rang Undang-Undang ini.

13. *Fasal 10* bertujuan memperuntukkan jenis-jenis aktiviti dan pengendalian yang boleh dibenarkan oleh Menteri untuk dijalankan dalam mana-mana zon bebas.

14. *Fasal 11* dan *12* masing-masing bertujuan memperuntukkan barang-barang yang dibenarkan ke dalam suatu zon perindustrian bebas dan zon perdagangan bebas.

15. *Bahagian III* bertujuan memperuntukkan fungsi-fungsi tertentu bagi Pihak Berkuasa yang mengurus dan mengendalikan suatu zon bebas.

16. *Fasal 13* memberi Menteri kuasa untuk menghendaki Pihak Berkuasa mengadakan dan menyenggarakan kemudahan-kemudahan yang perlu bagi membolehkan suatu zon bebas berfungsi dengan sepatutnya dan cekap. *Fasal* ini juga memberi kepada Menteri kuasa untuk mengeluarkan arahan-arahan kepada Pihak Berkuasa yang difikirkannya perlu bagi membolehkan suatu zon bebas berfungsi dengan sepatutnya dan bagi maksud melindungi hasil. *Fasal* ini juga mengenakan suatu kewajipan ke atas Pihak Berkuasa untuk mengadakan kemudahan-kemudahan kepada pegawai-pegawai kastam bagi pengawasan yang sepatutnya barang-barang yang dibawa ke dalam atau keluar dari suatu zon bebas dan untuk menyediakan kepungan-kepungan yang mencukupi bagi mengasingkan suatu zon bebas dari kawasan utama kastam bagi perlindungan hasil dan juga mengawal pergerakan orang-orang, kenderaan-kenderaan, vesel dan barang-barang yang masuk dan keluar dari suatu zon bebas.<sup>(</sup>

17. *Fasal 14* adalah berkenaan dengan pembinaan bangunan-bangunan dan lain-lain binaan dalam suatu zon perindustrian bebas dan juga mengenai memajak, mengambil, memegang atau menikmati harta alih dan harta tak alih dalam suatu zon bebas.

18. *Fasal 15* melarang kemasukan ke dalam atau permastautinan dalam zon perindustrian bebas.

19. *Fasal 16* memberikuasa kepada Pihak Berkuasa, mengikut budi bicaranya, memerintah pengecualian atau pemindahan apa-apa barang atau pemberhentian apa-apa aktiviti atau pengendalian yang merbahaya atau mudarat kepada kepentingan, kesihatan atau keselamatan awam, dari suatu zon bebas. *Fasal* ini bertujuan memperuntukkan bahawa perintah yang dibuat oleh Pihak Berkuasa hendaklah berkuatkuasa dengan serta-merta kecuali suatu perintah untuk memberhentikan apa-apa pengendalian yang hendak berkuatkuasa hanya selepas Menteri memutuskan rayuan itu, jika ada, memihak kepada Pihak Berkuasa. *Fasal* ini selanjutnya memperuntukkan bahawa keputusan Menteri adalah muktamad dan tidak tertakluk kepada kaji semula oleh mana-mana mahkamah.

20. *Fasal 17* adalah berkenaan dengan bentuk dan cara yang ditetapkan oleh Pihak Berkuasa bagi menyimpan akaun-akaun suatu zon perindustrian bebas dan pengemukaan laporan tahunan kepada Menteri oleh Pihak Berkuasa.

21. *Bahagian IV* bertujuan memperuntukkan bagi kesalahan-kesalahan, penalti-penalti, penggeledahan, penyitaan, tangkapan dan peruntukan-peruntukan mengenai perbicaraan dan prosiding di bawah Rang Undang-Undang ini.

22. *Fasal 18* bertujuan memperuntukkan bahawa seseorang yang dalam kuasanya untuk memberi maklumat atau untuk mengemukakan dokumen-dokumen mengenai apa-apa perkara yang disiasat oleh seorang pegawai kastam yang hak adalah terikat untuk memberi maklumat dan mengemukakan dokumen-dokumen itu.

23. *Fasal 19* bertujuan memperuntukkan penalti bagi kesalahan-kesalahan yang tidak ada penalti-penalti lain diperuntukkan dalam Rang Undang-Undang ini.

24. *Fasal 20* bertujuan memperuntukkan hukuman bagi apa-apa percubaan untuk melakukan, atau bersubahat melakukan, suatu kesalahan di bawah Rang Undang-Undang ini. Hukuman yang diperuntukkan di bawah *fasal* ini adalah sama dengan hukuman bagi kesalahan utama.

25. *Fasal 21* memperuntukkan bagi penggeledahan dengan waran premis yang disyaki dengan munasabahnya digunakan untuk menyembunyikan barang-barang dalam melakukan suatu kesalahan.

26. *Fasal 22* memberikuasa kepada mana-mana pegawai kanan kastam untuk membuat suatu penggeledahan tanpa waran dalam suatu zon bebas jika dia mempunyai sebab yang munasabah bagi dipercayai bahawa dalam mana-mana kedai, gudang dan

bangunan atau tempat lain ada tersembunyi atau didepositkan apa-apa barang yang berkaitan dengannya suatu kesalahan di bawah Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Akta ini atau mana-mana peraturan yang dibuat di bawah undang-undang yang disebutkan itu telah dilakukan.

27. *Fasal 23* memberikuasa kepada mana-mana pegawai kastam untuk menahan dan memeriksa atau menggeledah mana-mana kenderaan dalam zon bebas bagi maksud menentukan sama ada kenderaan itu mengandungi apa-apa barang-barang yang melanggar Akta Kastam 1967, Akta Eksais 1976, Akta Cukai Jualan 1972, Akta Cukai Perkhidmatan 1975 atau Rang Undang-Undang ini.

28. *Fasal 24* memberikuasa kepada mana-mana pegawai kastam yang hak dalam zon bebas untuk memeriksa apa-apa barang yang keluar atau memasuki suatu zon bebas dan membuka apa-apa bungkusan atau bekas bagi maksud pemeriksaan itu.

29. *Fasal 25* memberikuasa kepada mana-mana pegawai yang hak untuk memeriksa orang atau barang-barang dan begasi-begasi sesiapa yang memasuki atau keluar dari suatu zon bebas.

30. *Fasal 26* adalah berkenaan dengan penyitaan barang-barang dan dokumen-dokumen yang adalah subjek bagi suatu kesalahan dan cara bagaimana barang-barang itu boleh diuruskan.

31. *Fasal 27* adalah berkenaan dengan kuasa seseorang pegawai kanan kastam untuk memerintah pemulangan sementara atau pelupusan barang-barang yang disita di bawah Rang Undang-Undang ini.

32. *Fasal 28* dan *Fasal 29* masing-masing bertujuan memperuntukkan kepada pegawai kastam dengan kuasa untuk menguatkuasakan tangkapan itu tanpa waran dalam suatu zon bebas dan cara bagaimana tangkapan itu boleh dilaksanakan.

33. *Fasal 30* bertujuan memperuntukkan kuasa untuk mendakwa di bawah Rang Undang-Undang ini.

34. *Fasal 31* bertujuan untuk melindungi pemberi maklumat daripada diketahui atau didedahkan dalam mana-mana prosiding sivil atau jenayah di bawah Rang Undang-Undang ini dan pada masa yang sama *fasal* ini juga memperuntukkan perlindungan dengan memberi mahkamah budi bicara untuk memerintah pendedahan identiti pemberi maklumat demi mencapai keadilan dalam mana-mana kes tertentu.

35. *Fasal 32* bertujuan untuk memperuntukkan bagi kesalahan-kesalahan yang dilakukan oleh suatu syarikat perkongsian, pertubuhan, kumpulan orang dan oleh pengkhidmat atau ejen suatu syarikat, perkongsian, pertubuhan atau kumpulan orang itu. *Fasal* ini juga memperuntukkan bahawa prinsipalnya hendaklah bertanggung atas kesalahan-kesalahan yang dilakukan oleh pengkhidmat atau ejennya.

36. *Fasal 33* bertujuan memperuntukkan bagi mengkompaun kesalahan-kesalahan di bawah Rang Undang-Undang ini oleh pegawai kanan kastam.

37. *Fasal 34* bertujuan untuk melindungi Kerajaan dan Pihak Berkuasa daripada liabiliti bagi apa-apa kerugian berkenaan dengan apa-apa barang-barang kerana kebakaran, kecurian atau kerosakan semasa barang-barang itu disimpan dalam gudang kastam atau dalam kawalan atau jagaan yang sah mana-mana pegawai kastam atau pekerja Pihak Berkuasa melainkan jika pegawai kastam atau pekerja Pihak Berkuasa itu mengikut mana yang berkenaan adalah bersalah atau cuai.

38. *Fasal 35* bertujuan untuk melindungi pegawai-pegawai kastam daripada liabiliti bagi apa-apa kerugian atau kerosakan kepada barang-barang semasa barang-barang itu disimpan dalam gudang kastam atau dalam jagaan atau kawalan yang sah pegawai kastam itu melainkan jika kerugian atau kerosakan itu disebabkan oleh kecuai atau keingkaran pegawai kastam itu.

39. *Fasal 36* bertujuan melarang apa-apa tuntutan untuk kos atau gantirugi dalam apa-apa presiding berkenaan dengan barang-barang yang disita di bawah Rang Undang-Undang ini kecuali dalam hal jika penyitaan itu dibuat tanpa sebab yang munasabah atau sebab yang mungkin.

40. *Fasal 37* bertujuan memperuntukkan pendakwaan dan hukuman bagi pesalah-pesalah di bawah mana-mana undang-undang bertulis yang lain bagi perbuatan, ketinggalan, atau kecuai atau keingkaran yang menjadi suatu kesalahan di bawah Rang Undang-Undang ini.

41. *Fasal 38* bertujuan memperuntukkan barang-barang yang boleh dikenakan penyitaan di bawah Rang Undang-Undang ini hendaklah juga boleh dikenakan perlucuthakan.

42. *Fasal 39* adalah berkenaan dengan kuasa mahkamah untuk memerintah pelupusan, perlucuthakan atau pelepasan barang-barang yang disita di bawah Rang Undang-Undang ini dan juga menjadi hal-perkara suatu kesalahan di bawah Rang Undang-Undang ini atau untuk membuat perintah bagi perlucuthakan amaun yang dicagarkan di bawah *fasal 27 (1) (b)* berkenaan dengan barang-barang itu.

43. *Fasal 40* bertujuan untuk menguruskan cara bagaimana barang-barang yang disita di bawah Rang Undang-Undang ini tetapi berkenaan mana tidak ada pendakwaan. Khususnya, *fasal* ini memperuntukkan bagi suatu siasatan oleh Majistret Kelas Pertama dengan maksud untuk memerintah perlucuthakan atau pelepasan barang-barang itu. -.

44. *Fasal 41* memperuntukkan bahawa jika suatu permohonan dibuat kepada Menteri berkenaan dengan barang-barang yang disita dan dilucuthak di bawah Rang Undang-Undang, Menteri boleh memerintah barang-barang itu dipulangkan kepada pemuhanya atau orang lain yang berhak atas barang-barang itu. *Fasal* ini bagaimana pun adalah tertakluk kepada satu proviso, iaitu permohonan itu mesti dibuat dalam tempoh satu bulan daripada tarikh perlucuthakan.

45. *Bahagian V* memperuntukkan bagi peruntukan-peruntukan pelbagai.

46. *Fasal 42* memperuntukkan bahawa vesel-vesel yang ditambah sepanjang tepi dermaga suatu zon bebas hendaklah disifatkan sebagai berada dalam zon bebas itu.

47. *Fasal 43* memberikuasa kepada seorang pegawai kastam yang hak untuk mengambil sampel-sampel barang-barang bagi maksud menentukan duti kastamnya.

48. *Fasal 44* bertujuan memperuntukkan bahawa anggota-anggota Pihak Berkuasa dan pekerja-pekerjanya adalah disifatkan sebagai pengkhidmat-pengkhidmat awam bagi maksud Kanun Keseksaan.

49. *Fasal 45* memberikuasa kepada Ketua Pengarah Kastam untuk memberi upah kepada mana-mana pegawai kastam atau mana-mana orang lain bagi perkhidmatan-perkhidmatan yang diberikan berhubung dengan pengesanan kesalahan-kesalahan penyeludupan dan kesalahan-kesalahan lain di bawah Rang Undang-Undang,

50. *Fasal 46* memperuntukkan bahawa sesuatu rayuan hendaklah ditujukan kepada Menteri oleh mana-mana orang yang terkilang oleh keputusan Ketua Pengarah Kastam atau Pihak Berkuasa kecuali dalam hal-hal jika keputusan yang dirayu itu adalah keputusan-keputusan mengikut budi bicara mutlak Pihak Berkuasa atau Ketua Pengarah.

51. *Fasal 47* memberikuasa kepada Menteri untuk membuat peraturan-peraturan di bawah Rang Undang-Undang ini.

52. *Fasal 48* memberikuasa kepada Menteri untuk mewakili kuasa-kuasanya di bawah Rang Undang-Undang ini kecuali kuasa-kuasanya di bawah *fasal 10 (2)* dan kuasa-kuasanya untuk membuat peraturan-peraturan di bawah *fasal 47*.

53. *Fasal 49* memperuntukkan bagi pemansuhan Akta Zon Perdagangan Bebas 1971, dan pindaan-pindaan yang berbangkit kepada undang-undang bertulis yang disebut dalam Jadual Ketiga.

54. *Fasal 50* bertujuan memperuntukkan bahawa Zon-Zon Perdagangan Bebas yang sedia ada yang diisytiharkan di bawah Akta Zon Perdagangan Bebas 1971 yang dimansuhkan hendaklah disifatkan sebagai Zon Perindustrian Bebas di bawah Rang Undang-Undang ini.

55. *Fasal 51* memperuntukkan bahawa Menteri boleh membatalkan mana-mana perintah atau pengisytiharan yang dibuat di bawah undang-undang bertulis yang terdahulu berkaitan dengan Zon-Zon Perdagangan Bebas dan di bawah Rang Undang-Undang ini.

56. Jadual Pertama Rang Undang-Undang ini menyenaraikan aktiviti-aktiviti pengilangan yang diluluskan oleh Menteri untuk dijalankan dalam suatu Zon Perdagangan Bebas yang dinamakan di dalamnya.

57. Jadual Kedua Rang Undang-Undang ini menyenaraikan aktiviti-aktiviti yang diluluskan oleh Menteri untuk dijalankan dalam suatu Zon Perindustrian Bebas yang dinamakan di dalamnya.

58. Jadual Ketiga Rang Undang-Undang ini menerangkan pindaan-pindaan yang berbangkit dan pemansuhan yang disebut di bawah *fasal 49* Rang Undang-Undang.

#### IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan, [PN. (U) 1496.]